

ՍՈՑԻԱԼԱԿԱՆ ՀԱՐԱԲԵՐՈՒԹՅՈՒՆՆԵՐԻ ԱՐՏԱՑՈԼՈՒՄԸ
«ԿԱՆՈՆԱԳԻՐՔ ՀԱՅՈՑ» ՈՒՄ

Պրոֆ. Ս. Խ. ՀԱԿՈԲՅԱՆ

Պատմական գիտությունների թեկնածու Վազգեն Հակոբյանի աշխատասիրությամբ, առաջարանով, ծանոթագրություններով լույս է տեսել «Կանոնագիրք Հայոց» գրքի առաջին հատորը¹։ Պարբերական մամուլում լույս տեսած գրախոսություններում րստ արժանիության գնահատված է այդ ուշագրավ գործը։ Սույն հոդվածում մենք կաշխատենք ցույց տալ, թե ինչպիսի անգնահատելի սկզբնաղբյուր է դա վաղ ֆեոդալիզմի պատմաշրջանի Հայաստանի սոցիալ-տնտեսական, իրավա-քաղաքական կյանքի, գասակարգային հակամարտությունների, սոցիալական շարժումների, հայ ժողովրդի դրազմունքի, նիստ ու կացի, սովորույթների և բազմաքանակ այլ հարցերի ուսումնասիրության համար։ Հայտնի է, որ Հայաստանում III դարի վերջին, այսինքն այն ժամանակ, երբ արդեն իշխող էր դարձել արտադրության ֆեոդալական եղանակը, քրիստոնեությունը հռչակվեց որպես պետական կրոն։ Սկսած վաղ ֆեոդալիզմի դարաշրջանից, հայ եկեղեցին իր քաղաքական գերիշխանությանն է ենթարկում և իր ձեռքում կենտրոնացնում «Հայոց տան» իրավագիտական, օրենսդրական և զգործակալութեան մեծի դատաւարութեան» իշխանությունը։ Արշակունիների անկումից հետո Հայաստանի քաղաքական և օրենսդրական կենտրոններն են դառնում եկեղեցական կամ «ազգային» ժողովները։ Այդ ժողովներում քննարկվում և հաստատվում են ոչ միայն եկեղեցու ներքին կյանքին վերաբերող, այլև աշխարհիկ բնույթի բազմաթիվ հարցեր։ «Ազգային» ժողովներում մշակվում և հաստատվում են հանցանքների տեսակները, սահմանվում պատիժների չափերը, մշակվում են համապատասխան կանոնական որոշումներ, որոնք վերաբերում են աշխարհիկ և հոգևոր ֆեոդալների, սրանց և անմիջական նյութական բարիքներ արտադրողների միջև առաջացած հարաբերությունների, հողատիրության կնճռոտ պրոբլեմի, բնտանեկան հարաբերությունների և այլն կարգավորմանը։ Հայտնի է, որ մինչև «հայաբարբառ», «հայախօս» կանոնների հանդես գալը թարգմանվել և Հայաստանում լայն տարածում էին գտել «Սահմանք եւ կանոնք զոր եզին աշակերտքն Քրիստոսի», «Երկրորդ առաքելական», «Կանոնք յետ առաքելոց», «Կանոնք նիկիական», «Կանոնք Անկիւրեայ», «Կանոնք Կեսարեայ», «Կանոնք Նիոկեսարեայ», «Կանոնք Գանգրայ», «Կանոնք Անտիոքայ», «Կանոնք Լաոդիկեայ», «Կանոնք Սարգիկեայ», «Կանոնք Կոստանդնուպոլսի ժողովոյն», «Կանոնք Եփեսոսի ժողովոյն», «Կանոնք Աթանասի», «Կանոնք Բարսեղի» անուններով հայտնի կանոնները։ Ջնայած թարգմանված և Հայաստանում լայն տարածում գտած օտարաբան կանոնական որոշումները կարգավորում էին մարդկանց մեջ ստեղծված շատ ու շատ հարաբերություններ, սակայն սկսած IV դարից հայ ֆեոդալական

¹ Տե՛ս «Կանոնագիրք Հայոց», աշխատասիրությամբ՝ Վազգեն Հակոբյանի, խմբագրությամբ՝ Ն. Ս. Անասյանի, էջ. Ա. Պիվազյանի, ՀՍՍՀ ԳԱ հրատարակչություն, Երևան, 1964։

իրականությունը օրենսդիրների առաջ հրամայարար պահանջ է առաջադրում ստեղծել նաև «հայարարառ» կանոններ:

Այս կանոնական որոշումներից մեզ են հասել Գր. Նուսավորչի (IV դար), Աշտիշատի ժողովի (354 թ.), Սահակ Պարթևի (IV դար), Շահապիվանի ժողովի (447 թ.), Հովհան Մանգակունու (V դար), Կարինի ժողովի (VI դար), Ներսես կաթողիկոսի և Ներշապուհ Մամիկոնյան եպիսկոպոսի (VI դար), Ներսես կաթողիկոսի (VI դար), Սահակ կաթողիկոսի (VI դար) և Հովհաննես Իմաստասեր Օձնեցու (VIII դար) կանոնները:

Բազմաթիվ ու բազմապիսի կանոնների ու կանոնական որոշումների գոյության հանգամանքը պահանջ է հարուցում հավաքել, դասակարգել դրանք և ստեղծել մեկ ամբողջական կանոնադիրք:

Այս դժվարին գործն իր ձևերն է վերցնում VIII դարի սկզբին հանդես եկած, իր ժամանակաշրջանի կրթված, բազմակողմանիորեն զարգացած, եկեղեցական և քաղաքական ակտիվ գործիչ Հովհաննես Իմաստասեր Օձնեցի կաթողիկոսը:

«Կանոնագրքի» կազմողը քաջ գիտակցել է իր ձևնարկած գործի և՛ դրժվարությունները, և՛ նշանակությունը: «Կազմեցին սուրբ հարքն,— գրել է Օձնեցին,— զկանոնական բանից դիտաւորութիւն...: Եւ վասն զի ոմանք առ ոմանս Էւ ոչ ամենքին առ ամենեսեան սորա սերմանեալք, կամեցայ զրովանդակ զառ ի նոցանէն կանոնական սահմանեալ բան ի միում տեղւոջ զեղեցկագործ մատենիւ ի հայրապետանոցի աստ արմատացուցանել»²:

Արդեն վերը նշվեց, որ «Կանոնագրքի» շատ հոգվածներ, որոնք քաղաքացիական օրենսդրության ուժ ունեին, իրավական կարգավորման տակ են առնում հայ ֆեոդալական հասարակության սոցիալ-տնտեսական կյանքի շատ ու շատ հարցեր: Եթե փորձենք համախմբել, դասակարգել և բաղդատել նրա բազմաթիվ էջերում ցրված բազմաքանակ կանոնական որոշումները ըստ բովանդակության կամ նյութի, ապա դրանք կարելի է ստորաբաժանել հետևյալ հիմնական խմբերի.

1. Հալ ժողովրդի նիստ ու կացը, կենցաղը և սովորույթները:

Մի շարք կանոնական որոշումներից ակնհայտ է դառնում, որ քրիստոնեության մուտքից հետո էլ դեռևս Հայաստանում շատ ուժեղ և կենսունակ էին հեթանոսական սովորույթները, ծեսերը: Այս սովորույթների, ծիսակատարությունների ղեմ բազմաթիվ կանոններ են հաստատել քրիստոնեական վարդապետության առաքյալները: Վյսպես, օրինակ, Առաքելական, Բարսեղ Կեսարացու, Աթանասի, Սահակ Պարթևի, Շահապիվանի ժողովի կողմից մշակված և այլ կանոններում խիստ կերպով դատապարտվում են հեթանոսական հին սովորությունները, ծեսերը: Մի շարք կանոններում ասված է, որ «Կարգեցին առաքեալքն եւ եղին հաստատութեամբ», որ եթե որեւէ հավատացյալ, լինի հոգևորական թե աշխարհիկ՝ «Երթայ առ կախարդս եւ հարցուկս, եւ քաղեայս, եւ վհուկս, եւ հաւատայ ծննդոց եւ աստեղագիտութեանց» կամ «Երկիր պաղանեն արարածոց փոխանակ Արարչին», ոչ միայն իրավունք չունի եկեղեցի մտնել, այլև պետք է դատապարտվի, իսկ եթե կրոնավոր է՝ անհապաղ պետք է կարգալույծ արվի³:

² Նույն տեղում, էջ 535—536:

³ Նույն տեղում, էջ 37—38:

Աթանաս Աղիքսանդրացու կանոններում դատապարտվում են այն բոլոր «ավատացյալները, որոնք «հեթանոսաբար, անյուսութեամբ եւ անառակութեամբ, փողովք եւ լկտութեամբ, պարուք» կոծ են անում իրենց զավակների, հարազատների դիակների վրա, ուրբեր լաց ու կոծի ժամանակ ճակատները դետնին են դարկում, արյուն են հանում և շեն ունկնդրում «ծայնի խրատու քահանայիցն, այլ թշնամանել եւս եւ մերժել յինքեանց զքահանայսն անյուսութեան բանիւք...»⁴:

Առաքելական կանոնները այդ կարգի հեթանոսների համար նախատեսում են պատժի հետևյալ տեսակներ. նախ պահանջում են նրանց դարձի բերել, իսկ եթե դարձի չեն դալիս, իրավունք է վերապահվում «արտաքոյ եկեղեցւոյ առնել...»: Եթե որևէ հավատացյալ, սահմանել է Բարսեղ Կեսարացին, «ընդ հեթանոսի պոռնկեաց», նա եկեղեցու գիրկը կարող է վերադառնալ միայն յոթ տարի ապաշխարելուց հետո, իսկ եթե կրոնավոր է՝ կարգալույծ է արվում⁵:

Եկեղեցու սկզբունքներին խորթ նախաքրիստոնեական սովորույթների, հեթանոսական շրջանից եկած նիստուկացի, րնտանեկան հարաբերությունների, ծիսակատարությունների, խաղերի, պարերի և այլ երևույթների դեմ ամենից զաժուռ պատժիչ միջոցներ են նախատեսվում Շահապիվանի ժողովի կողմից մշակված կանոններում:

Արդար և ճշմարիտ օրենսդիր առաջնորդների և մանավանդ «Սահակայ Հայոց կաթողիկոսի եւ հոգելից, հոգեկիր, ճշմարտասէր վարդապետին Մեսրովբայ» մահից հետո, ասված է Շահապիվանի ժողովի հրավիրման զրդապատճառների մասին, «լինէր եղծումն եւ քայքայումն կարգաց եւ աւրինաց սրբոյ եկեղեցւոյ...»: Հայ եկեղեցու «եղծման և քայքայման» հիմնական պատճառները ժողովը համարում է Հայաստանում լայն տարածում գտած բաղմաթիվ «պղծութիւնք»: Սակայն այդ դանազան «պղծութիւններից ավելի ահալոր էր «Մծղնէից եւ այլոց շարեաց՝ կնահանէից, պոռնկաց, զոդոց, անձնակամակաց, ամենայն խոտորնակ» այն աղանդը, որը լայն տարածում էր գտել «յաշխարհիս Հայոց ի մէջ տանս Թորգոմայ»⁶:

Շահապիվանի ժողովին հավաքված աշխարհիկ և հոգևոր ֆեոդալները մշակում և հաստատում են մի շարք կանոններ՝ Հայաստանում լայն տարածում գտած «հակահասարակական» երևույթները արմատախիլ անելու, հայ ֆեոդալական եկեղեցու հեղինակությունը պահպանելու համար:

Ժողովն աշխարհիկ և հոգևոր ֆեոդալների պիղծ, այլասերված վարքի ու բարքի, շահատակությունների, ամուսնալուծության, առևանգումների, կախարդության, հմայության, մերձամուսնության, մենակեցության, մահացածների վրա լաց ու կոծ անելու և մծղնեական աղանդի վերաբերյալ մշակում և հաստատում է մի շարք կանոններ:

Շահապիվանի կանոնները նույնպես դատապարտում են հեթանոս սովորույթները, ծիսակատարությունները: Այստեղ հեթանոսական սովորույթներ կրողների համար նախատեսված են ավելի դաժան պատիժներ՝ ծեծ, մրել, քարկոծել, աղվեսդրոշմ խարանել, տուգանել և այլն: Եթե հավատացյալները, սահմանված է Ը կանոնում, բռնվեն «ի կախարդութեան», «...յուրացութեան», կամ

⁴ Նույն տեղում, էջ 304—305:

⁵ Նույն տեղում, էջ 349:

⁶ Նույն տեղում, էջ 425—426:

«յայլ շարագործութեան» մեջ և «պղջումն և յապաշխարութիւն ոչ եկեացեն» նրանց «ըստ գրոց հրամանի» պետք է «քարկոծ» անել: Եթե քրիստոնյաներն «...ի հարցուկս երթան կամի գիթել՝ տուգան կալցին. եթէ աղատ է՝ Ս(200) դրամ, եթէ շինական է՝ զան արցել ժե կրկին, Ճ(100) դրամ տուգան կալցին և... Գ. ամս ապաշխարեալ՝ հաղորդեսցին: Ապա եթէ եպիսկոպոս կամ երէց երթեալ իցեն ի հարցուկսն... եպիսկոպոսն յեպիսկոպոսութենէն անկցի և երէցն յերիցութենէն լուծցի»: Հանցապարտ եպիսկոպոսի, երեցի համար նախատեսվում է նաև զրամական տուգանք: Հանցանքի մեջ բռնված եպիսկոպոսը պետք է վճարի Ռ (1000), երեցը՝ Շ (500) դրամ տուգանք: Բրավունք է վերապահված դյութող, կախարդող, հարազատների վրա լաց ու կոծ անող կանանց ոչ միայն խանձել, մրել, այլև «ոսկր արկցեն և յարկանոց տացեն՝ Բ ամս աղասցեն զողեացն և զինչ և հրամայեսցեն գործել»:

2. Ընտանեկան հարաբերություններ: «Կանոնագիրք Հայոց»-ում զգալի տեղ է հատկացված կանանց և տղամարդկանց հարաբերություններին, ընտանեկան հարցերին, երեխաների դաստիարակությանը: Կանոնական որոշումներում կինը դիտված է որպես հասարակության ոչ իրավահավասար անձ: Ուշագրավ է, որ «հանցապարտ», «օրինազանց» կնոջ համար նախատեսված են սովելի դաժան պատժի միջոցներ, քան նույն հանցանքը պործած տղամարդու համար: Առաքելական և եկեղեցական բոլոր ժողովներում մշակված բազմաթիվ կանոնները միայն ապաշխարություն են սահմանում այն հայրերի համար, որոնք պատժում են իրենց կամքը չկատարող զուտերերին, և այն տերերի համար, որոնք անարգում, բռնաբարում կամ թե մահապատժի են ենթարկում իրենց մոտ ծառայության մտած կին ծառա-աղախիններին: «Արտաբոյ կամաց տեառնն» աղախնու ամուսնությունը համարվել է պոռնկություն: Եթե որևէ աղախին, սահմանել է Բարսեղ Կեսարացին, «...արտաբոյ կամաց տեառնն իւրոյ ամուսնասցի՝ ի պոռնկութիւն համարեալ է...»⁶: Այդ նույն կանոնն արգելում է հոգևորականներին ամուսնանալ աղախինների հետ⁹:

Շահապիվանի ժողովը հաստատում է մի շարք կանոններ մերձամուսնութեան դեմ: Բոլոր կանոններում էլ այս ակտը համարվում է սովորույթ «հեթանոսաց և անաստուած ամպարիշտ աղգաց»: Եթե, սահմանված է ժե՝ կանոնում, «զկին հար որդի ունիցի» կամ «հայր զորդույ կին ունիցի կամ եղբայր զեղբայր» կամ «հարազատի և զազգականի», եթե հանցապարտ տղամարդն է, ապա նա հալածվում է, անիծվում և յոթ տարի ապաշխարելուց և զրամական տուգանք վճարելուց հետո կարող է վերադառնալ եկեղեցու գիրկը, իսկ եթե հանցապարտը կին է և նրա «կամար իցէ խառնակութիւնն՝ զպատուհասն և զտուգանս և զնզովս զնոյն կրեսցէ և յապաշխարհութիւն կալցին զկինն և յարկանոց տացեն, ժ տարի աղասցէ զողեացն, ապա եթէ աղատ է և ի գողիսն երթայ՝ 3 (300) դրամ տացէ նոցա»¹⁰:

ԺԳ կանոնը պատվիրում է շամուսնանալ քրոջ, քեռորդու, եղբորորդու կամ «զայլ ոք յազգի անգ իւրում մինչև ի շորորդ ծնունդն...»: Կանոնը միաժաման-

⁷ Նույն տեղում, էջ 440—443.

⁸ Նույն տեղում, էջ 348.

⁹ Նույն տեղում, էջ 431—432.

¹⁰ Նույն տեղում, էջ 444—446, հմտ. նաև էջ 297 և հտ.:

նակ պահանջում է «ի կարգէ պաշտանէիդ» հեռացնել այն հոգևորականին, որո «այնպիսեացն պսակ արհնեսցէ...»¹¹:

Որ ոչ միայն հին, այլև միջնադարյան Հայաստանում կանայք իրավապարզ էին՝ այդ են ապացուցում կանոնական այլ որոշումներ ևս: Այսպես օրինակ. կանանց արգելված էր հանգես գալ գատարաններում ոչ միայն որպես հայցավոր կամ պատասխանող, այլև որպես վկա: «Իսկ զկանայս ոչ է պարտ ընգունել վկայս, այլ արբանեակս վկայից»: Բայց եթե «այնպիսի ինչ պատահէ զի կանայք միայն իցեն իրաց ինչ տեսողք և վկայք... պարտ է զի կրկին իցեն նորա րան դարսն, զի արանց վկայն երկու կամ երեք հրամայեցաւ, և նորա լիցին չորս կամ վեց»: Ավելին, օրենսդիրները արգելում են վկա կանանց ներկայանալ դատարան և այնտեղ տալ վկայություն: Նրանք վկայություն կարող են տալ տանը միայն և այն էլ «հաւատարիմ արանց» միջոցով¹²:

3. Հողային, գույժային սեփականատիրության և ժառանգական իրավունք: Հայ ֆեոդալական եկեղեցին, հոգևոր ֆեոդալական ավագանին խիստ մտահոգված էին անձեռնմխելի հռչակել եկեղեցիների, վանքերի, հոգևոր և աշխարհիկ ֆեոդալների, «սեպհական» ժառանգությունը: Կանոնական բազմաթիվ որոշումների մեջ հետևողականորեն անցկացված է այն դրույթը՝ «թէ ի սկզբանէ որպիսի հրաման ի սրբոյն Գրիգորէ է լեալ՝ նոյնպէս և եղիցի... զժառանգութիւն սրբոյ եկեղեցւոյ իբրեւ զազատութիւն է... ազատ ի հարկէ և բեկարէ»¹³: Քրիստոնեության մուտքից հետո, ասված է Սահակ Պարթևի կողմից մշակված կանոններից մեկում (ՄԱ), հայ մեծամեծ նախարարները, իշխանները եկեղեցիներին «վասն անձանց փրկութեան» նվիրում են «զգեալոս և դաստակերտս և զգանձս ոսկւոյ և արծաթոյ...»¹⁴:

Մի շարք կանոններ արգելում են վաճառքի հանել վանքապատկան, եկեղեցապատկան հողերը, գյուղերը: Այսպես օրինակ, արգելվում է վաճառքի հանել «...վասն ընչից որ անուանեսալ իցէ եկեղեցւոյ զինչ և իցէ՝ թէ գեալոք թէ մարդք և կամ այլ ինչ...»¹⁵:

Սահակ Պարթևը նույնպես անձեռնմխելի է հռչակում եկեղեցու «սեպհական ժառանգութիւնն»: Եթէ որեւէ մեկը, սահմանել է հայոց հայրապետը, «ուտէ եկեղեցւոյ իրս՝ տացէ ընդ միոյն շորս»:

Արդեն IV—V դարերում հայ եկեղեցին, հոգևոր ֆեոդալական ավագանին՝ տնտեսական այնպիսի հզորության էին հասել, որ աշխարհիկ ֆեոդալները և կսել էին դաժան ու համառ պայքար հոգևոր կալվածատիրական ձգտումները եթե ոչ վերացնելու՝ գոնե սահմանափակելու համար: Այդ պայքարն այնքան էր սրվել, որ Դավիթ ժողովն ստիպված հատուկ որոշում է կայացնում և դատապարտում հայ «ազատանիի» արարքները:

«Ոմանք յազատաց, — ասված է Դավիթի ժողովի ժ կանոնում, ոչ միայն «ի վերայ վանաց իշխանութիւնս տունէն», այլ կամենում են վանականներին վանքերից հանեն և հարկանեն»: Ավելին, հայ ազատներից շատերն էլ, որոնք ունեն «սեպհական» գյուղեր, հարկատու բնակչություն ու քաղաքական իշխա-

¹¹ Նույն տեղում, էջ 447:

¹² Մ խ ի թ ա Ր Ե ո շ, Դատաստանագիրք, էջ 40—41:

¹³ Կանոնագիրք Հայոց, ձեռագրերի համեմատությամբ, խմբագրեց Արսեն Ղևոնդյան, Թիֆլիս, 1913, էջ 123—125:

¹⁴ Կանոնագիրք Հայոց, էջ 412:

¹⁵ Նույն տեղում, էջ 164:

նություն, դրանով երբեք չեն բավարարվում, այլ «յոլովք շարակնութեան առնեն», քանում են «զժառանգաւորս եկեղեցւոյ... ի ծառայութիւն եւ ի ստրկութիւն արկանել... զոր չէ արժան եւ օրէն»¹⁶։

4. «Կոռծակալութիւն մեծի վստաւորութեան» իշխանությունը:

Հայ եկեղեցու, հոգևոր ֆեոդալական ավագանու ձևերում էր կենտրոնացված ոչ միայն օրենսդիր, այլև գործադիր ու դատական իշխանությունը: «Կանոնագիրք Հայոց»-ի ուսումնասիրությունը ցույց է տալիս, որ եկեղեցական ժողովները, առաքելական կանոնները իրավունք են վերապահել հոգևոր դասին ավագանուն դատել և պատժել ոչ միայն հոգևորականներին, այլև աշխարհիկ քաղաքացիներին:

«Կանոնագիրք Հայոց»-ի ուսումնասիրությունը ցույց է տալիս, որ հանցանքներ էին համարվում հավատուրացությունը, աղանդներին հարելը և նույնիսկ համակրելը, աշխարհիկ և հոգևոր ֆեոդալական սեփականատիրության ղեմ ոտնձգություններ կատարելը, հայ «ազատանիին» անարգելը, հեթանոսական սովորություններին հարելը, մերձամուսնությունը, ծառայությունից փախչելը, ֆեոդալական, վանական, եկեղեցական հարկերն ու տուրքերը չվճարելը, պարհակները չկատարելը, գողությունը, ավադակությունը, մարդասպանությունը, հայրենիքի դավաճանությունը և առանձնապես «խռովարար» և «խռովասեր» ծառա-աղախիներին, շինականության խռովությունները, հուղումները, ապստամբությունները: «Կանոնագիրք Հայոց»-ի կանոնների ուսումնասիրությունը ցույց է տալիս, որ նրանք ունեն սոցիալ-գասակարգային խիստ ռեզյովյալ բովանդակություն: Այսպես օրինակ՝ «հանցապարտ», «օրինադանց» մարդկանց համար, եթե նրանք չեն պատկանում հայ ազատանիի դասին, նախատեսված են պատժիչ բոլոր միջոցները և նույնիսկ՝ մահապատիժ, բայց եթե այդ հանցանքները կատարել են նախարարները, ազատները, ապա միայն ապաշխարություն: Ապաշխարում են այն բոլոր տերերը, որոնք խոշտանգում, մահապատժի են ենթարկում իրենց հպատակներին և հատկապես՝ ծառաներին: Աթանաս Աղեքսանդրացին անհեղանդության պատճառով ծառային սպանող տիրոջ համար սահմանել է ապաշխարանք միայն¹⁷։

Շահապիվանի ժողովում մշակված կանոնները հանցապարտների և հերետիկոսների համար նախատեսում են դանաչարություն, քսոթ, ճակատներին ազվեսդրոշմի խարանում, ջղերը կտրել և այլն: Եթե, սահմանված է ժԹ կանոնում, որեւէ հոգևորական «ի մծղնէութեան գտցի» նրա ճակատին պետք է խարանել «աղուեսդրոշմ», լայց եթե նա կրկնի իր հանցանքը, ապա կանոնը իրավունք է վերապահում ոչ միայն կտրել նրա ջղերն ու գողենոց տանել, այլև նույն պատժին ենթարկել կնոջն ու երեխաներին. եթե «արք կանամբ և որդւովք գտցին յաղանդին, զարանցն և զկանանցն և զիրազէտ մանկանցն զջիղսս կտրեսցեն, աղուեսդրոշմ ի ճակատն զիցեն և ի գողենոց տացեն...»¹⁸։

Առաքելական ժողովները մահապատիժ են հաստատել այն մայրերի համար, որոնք «պոռնկին և զմանկունս սպանանեն»¹⁹։ Մահվան և ցմահ տաժանակիր բանտարկության են դատապարտվում նաև նրանք, ովքեր «...զաղտնի

¹⁶ Կանոնագիրք Հայոց, Թիֆլիս, 1913, էջ 126—127։

¹⁷ Նույն տեղում, էջ 303։

¹⁸ Նույն տեղում, էջ 461—462։

¹⁹ Նույն տեղում, էջ 170։

մահարեր ղեղովք... խողիսողեն զորդիս մարդկան եւ որք հրով կիզուն եւ հրդեհեն զվաստակս եւ զշինուածս... եւ մեծամեծ անիրս եւ բազում հարուածս. բազմադիմի եւ ազգի ազգի շարիս ածեն որդւոց մարդկան»։ Մահվան են դատապարտվում նաև նրանք, ովքեր «զսրբութիւնս կործանեն»²⁰։

5. Հոգևոր դասի վաւրն ու բաւրը։ «Ի պոռնկութեան... ի զոգութեան» «ըմբռնել» հոգևորականը, լինի եպիսկոպոս, երեց, թե սարկավագ, անմիջապես կարգալույծ է արվում²¹։ Կանոնական որոշումներում կան բազմաթիվ հոգվածներ այն մասին, որ ազահ հոգևորականները պայքարում են «ղայլոց վիճակն» հափշտակելու համար. զործադրում են «բռնութիւն», վերցնում են կամ տալիս են կաշառք, զբաղվում են վաշխառությամբ, իրենց արծաթը տալիս են «ի վարձու» և գանձում բարձր տոկոսներ²²։

Այս և ուրիշ այլանդակ երևույթներն այնքան լայն տարածում էին գտել հոգևոր հայրերի միջավայրում, որ Կանոնագիրքն այն դատապարտում է որպես հասարակական շարիք։ Կանոնական շատ որոշումներ արգելում են հոգևորականներին զբաղվել վաշխառությամբ, փոխտվությամբ, վարել պետական կամ զինվորական պաշտոններ, ծառայել որպես հարկահավաք կամ «զրոյ հարկացն»։ Կանոնագրքում կան բազմաքանակ հոգվածներ ոչ միայն հոգևոր, այլև աշխարհիկ ֆեոդալական միջավայրում լայն տարածում գտած վաշխի, առևտրական գործարքների, փոխտվության և այլ «զաղրելի» արարքների դեմ։ Կան բազմաթիվ կանոններ, որտեղ դատապարտվում է հարեցողությունը անբարոյականությունը։ Արգելվում է վանքերում ու եկեղեցիներում պահել կովկիթ, հացթուխ և ծառա-աղախին կանայք²³։ Սահակ Պարթևի, Ներշապուհ Մամիկոնյանի և Ներսես եպիսկոպոսի կողմից մշակված կանոնները պախարակում են այն հոգևոր հայրերին, որոնք իրենց հպատակներից ոչ միայն հարկեր ու տուրքեր են գանձում, այլև «ազահութեամբ զոսկոյ եւ արծաթոյ մթերս» են մթերում։ Հոգևորականների մի մասը, ասված է Ներսես եպիսկոպոսի և Ներշապուհ Մամիկոնյանի կողմից, փոխանակ «կրօնաւորութեամբ» զբաղվելու, դարձել են «ծիարոյծք եւ վաճառականք եւ վաշխառուք»²⁴։

«Քահանայք, կարգում ենք ի՞նչ կանոնում, մի արեցողք եւ մի հանգանակողք եւ մի արծաթագին աղախնայս ստանալ եւ կամ ի կապինաց պոռնկաց ի տունս տանել զգարշելիսն, զոր ոչ հրամայեն արէնք»²⁵։ Հոգևորականների զաղրելի գործերը, շար արարքները դառնում են «բաւրում յուղիցն եւ մեծամեծ ամբոխիցն» պատճառներ. մարդիկ զժգոհում են, տրտնջում, ապստամբում, որովհետև այդ զաղրելի արարքները ոչ չափ ունեն և ոչ սահման²⁶։

6. Հաւրկեր, տուրքեր, ֆեոդալական պաւհակները։ «Կանոնագիրք Հայոց»-ում չկան համապատասխան վկայություններ հարկերի, տուրքերի, ֆեոդալական պարհակների տեսակների ու չափերի մասին, սակայն մի շարք կանոններից ակնհայտ է դառնում, որ հայ շինականությունը վանքերին ու եկե-

20 Նույն տեղում, էջ 174—175։

21 Նույն տեղում, էջ 80։

22 Նույն տեղում, էջ 127—128։

23 Նույն տեղում, էջ 439։

24 Նույն տեղում, էջ 490։

25 Նույն տեղում, էջ 439։

26 Նույն տեղում, էջ 41—42, 80, 127—128, 245, 372, 452, 486 և հ.ա.։

ղեցիներին վճարել է «հաս», «պտուղ», «մուտ» և «տասանորդ» կոչված հարկերն ու տուրքերը:

Սահակ Պարթևի կողմից մշակված իր կանոնում սահմանված են եկեղեցիներին վճարելիք հարկերի տեսակները: Դեռևս մեր նախնիները կարգել են, ասված է այնտեղ, որ «չատկաց և ազապաց և դայրոց տալնից» ժողովուրդը «սիրով և լրջմտովեամբ» պետք է եկեղեցիներին «որպէս արէն է» վճարի «զպտուղս»: «Պտուղ» կոչված հարկն իր մեջ իմաստավորում էր «զպտուղ յամենայն արմտեաց»²⁷: Ներսէս Եպիսկոպոսի և Ներշապուհ Մամիկոնյանի կողմից մշակված կանոններում սահմանված է, որ հարկատուները հոծարությամբ և անխափան պետք է վճարեն «զպտուղս և զմուտս» հարկերը: ԺԳ կանոնից ակնհայտ է դառնում, որ հարկեր գանձելիս եկեղեցին նկատի է ունեցել երգ-ծովս: Ամեն մի երգ-ծխից գանձված «պտուղ և մուտ» կոչված հարկերը բաժանվել են հետևյալ կերպ. «Գլխաւոր քահանայիցն» բաժին է հանվել «համասունք և կէս մասին, և այլ քահանայքն մէն համասունս», իսկ սարկավաղներին՝ «մի մասն և կէս մասին», զպիրներին և այլրի կանանց՝ «մի մասն առանց ամենայն հակառակութեան»²⁸:

Մի շարք կանոններում պահպանվել են ուշագրավ վկայություններ այն մասին, որ նյութական բարիքներ արտադրողները հարկեր ու տուրքեր են վճարել նաև արքաներին: Այսպես, օրինակ, Շահապիվանի ժողովի կողմից մշակված իր կանոնում ասված է, որ եթե որեւէ մեկը «շնաբարոյ» վարքի տեր է և «ակն» ունի այլ կնոջ վրա և այդ պատճառով բաժանվում է կնոջից, նրա շարժական ու անշարժ կայքն ու զույրը բաժանեսցեն հասարակաց. զկեսն կնոջն տացեն... դարբունի հարկն ողջ արասցեն»²⁹: Ներսէս Կաթողիկոսի և Ներշապուհ Մամիկոնյանի կողմից մշակված իր կանոնը իրավունք է վերապահում կարգալույծ անել հոգևորական «երկականանաց», զրկել նրանց «ի պտղոյ և ի մտից սրբոյ եկեղեցոյ», իսկ տղետները «մի՛ իշխեսցեն մտից եկեղեցոյ... վասն անուսումնութեանն ընդ դիւնուորս կացցեն և զհայրենի հող և զջուր կայցին և յարքունիս հարկ տացեն»...³⁰:

7. Հայ ֆեոդալական հասարակության դասային ու սոցիալական կազմը:

Հայտնի է, որ ֆեոդալական հասարակական-տնտեսական ֆորմացիան ստորաբաժանվում էր երկու հիմնական դասակարգի, բաղմամբիվ դասերի ու խավերի միջև: Վաղ ֆեոդալական հայ հասարակության դասային ու սոցիալական կազմն իր արտահայտությունն է գտել նաև «Կանոնագիրք Հայոց»-ի մեջ: Հայ հասարակության ամենաբարձր աստիճանին միշտ էլ դասված են եղել մեծամեծ իշխանները, ավագ և կրտսեր նախարարները, ազատները, սեպուհները, ոստանիկները, իսկ ստորադաս աստիճանում՝ ուսմիկները, գեղջուկները, շինականները և հատկապես «լոկ ի ստացուածոց» ծառա-աղախները:

Կանոնագրքի մի շարք կանոններ մեզ հնարավորություն են տալիս ասելու, որ հայ շինականությունը համարվում էր ֆեոդալական հասարակության ստորադաս, հարկատու դասակարգը³¹: Շինականների և աղատների սոցիալական դրության տարբերությունն ամենից բացորոշ տրված է Շահապիվանի

²⁷ Նույն տեղում. էջ 384:

²⁸ Նույն տեղում. էջ 482—483:

²⁹ Նույն տեղում. էջ 435:

³⁰ Նույն տեղում. էջ 480:

³¹ Տե՛ս նույն տեղում, էջ 388:

Ժողովում մշակված ու հաստատված Գ, Դ, Ե, Է, Թ, Ժ, ԺԱ, ԺԲ կանոններում: Բոլոր կանոններում հանցապարտ «աղատի» համար նախատեսված են դրամական տուգանք և ասպաշխարություն միայն, իսկ նույն հանցանքը դորժած շինականի համար բացի դրամական տուգանքից, ասպաշխարությունից նաև զանահարություն, հարկադիր ու տաժանակիր աշխատանք և այլն: Այսպես, օրինակ, ժողովը դատապարտում է բոլոր նրանց, ովքեր «Կին ունիցեն ևւ պոռնկեսցեն» կամ թե կանանց արձակում են «առանց բոնի պոռնկութեան» կամ առանց «արատի ինչ շար ի մարմնոյ» կամ թե «ի հարցուկս երթան կամ ի դիթել... կամ կոծ դենն ի մեռելոյ»: Այս և այլ հանցանքներ դորժած մարդր եթե «աղատ է ևւ պան չէ մարթ հարկանել»: Ենթակա է միայն 200 դրամ տուգանքի և 2 տարվա ասպաշխարության, բայց եթե նա «շինական է գան յոլով արբցի ճ (100) դրամ տուգան տաղէ յեկեղեցի...»: Մի դեպքում «աղատի» համար հաստատված է 200, մյուս դեպքում 300—1200 դրամ տուգանք. ամեն պարագային շինականի դրամական տուգանքը կազմում է «աղատի» տուգանքի կեսը միայն: Բայց շինականի համար նախատեսվում է 2—10 տարի հարկադիր ու ձրի աշխատանք: Այս առումով խիստ ուշագրավ է ԺԲ կանոնը: Այստեղ ասված է, որ եթե «դկին հար որդի ունիցի... եթէ հայր զորդոյ կին ունիցի կամ եղբայր զեղբար... եւ եթէ կնոջն կամաւք իցէ խառնակութիւնն... կալցին դկին ևւ յարկանոց տաղեն Ժ (10) տարի աղասցէ գողեացն. ապա եթէ աղատ է ևւ ի գողիսն շերթայ՝ 3 (300) դրամ տաղէ նոցա»³²: Աշխարհիկ և հոգևոր ֆեոդալներից կախման վիճակում էին դրված շինականների շարքերից դուրս եկած աշխատամիջոցները և հողակտորները կորցրած մշակները: Հայաստանում մշակների թիվը շատ մեծ էր: Նրանց մի մասն աշխատում էր «արքունի հողերի» վրա և հայտնի էր «արքունի մշակք» անվան տակ, իսկ մյուս մասն աշխատում էր հոգևոր և աշխարհիկ ֆեոդալների մոտ: Դժբախտաբար Կանոնագրքում մշակների մասին բացի մի, և այն էլ մշուշապատ վկայությունից, այլ փաստեր չկան: Ներսես կաթողիկոսի և Ներշուպուհ Մամիկոնյանի և կանոնում ասված է, որ բնտանիքի թե՛ մեծերը, թե՛ որդիները և թե՛ մշակները «մեծի շարաթուն հրազայուցին... ի տունջեան արինաց մի հաղորդեսցին»³³: Այս կանոնը ուշագրավ է միայն մեկ առումով. այստեղից երևում է, որ մեծ և հարուստ բնտանիքներն ունեին ոչ միայն ծառա, աղախիներ, այլև մշակներ: Եթե ծառա-աղախիները աշխատում էին ֆեոդալների տանը որպես նաժիշտներ, դայակներ, խնամակալներ և այլն, ապա մշակները կատարում էին երկրագործական աշխատանք, աշխատում էին անասնապահության բնագավառում ու շինարարական կառուցումների վրա և այլն:

«Կանոնագիրք Հայոց»-ի ուշադիր ուսումնասիրությունը մեզ հնարավորություններ է ընձեռում ցույց տալու, որ վաղ ֆեոդալիզմի շրջանում բացի շինականներից, գլխավորներից, ռամիկներից կային նաև բաղմաքանակ ծառա-աղախիներ, հարճեր, վարձկաններ: Կղեմի ԺԵ, ԺԶ կանոնները խստիվ արգելում են եպիսկոպոս, երեց կամ սարկավագ ձեռնադրել նրանց, ովքեր «ընդ երկուսս սմուսնութիւնս խառնակեցաւ... կամ հարճս ստացաւ... կամ զաղախին կամ զրոդ»³⁴: Որ աշխարհիկ ու հոգևոր ֆեոդալները պահում էին բաղմաթիվ ծառա-

³² Նույն տեղում. էջ 446, տե՛ս և 433—434, 435—436, 441—442, 446 և հտ.:

³³ Նույն տեղում, էջ 488:

³⁴ Նույն տեղում, էջ 79:

ներ, աղախիններ, հարձեր և սրանք դրված էին հայ ֆեոդալական հասարակության ստորադաս աստիճանում, այդ են ապացուցում այլ փաստեր ես։ Այդ նույն կանոնախմբի ՀԶ կանոնը թույլ է տալիս ծառաներին ստանալ հոգևոր կոչումներ ու պաշտոններ միայն այն դեպքում, եթե կա տերերի համաձայնությունը. եթե ծառան հեղ է, հնադանդ, եթե նա «խռովարար» ու «խռովասեր» է, «Պառայս ի ծառանգաւորութիւն ընձեռել առանց տէրանցն կամաց՝ ոչ հրամայեմք... քանզի տանցն կործանումն է այս գործ. ապա եթէ երբեք արժանի երևեսցի ծառայն առ ի ձեռնադրութիւն աստիճանի... և թողացուցեն տեարք իւր եւ աղատասցեն եւ ի տանէն ի բաց առաքեսցեն՝ եղիցի»³⁵։

Մի շարք կանոններից ակնհայտ է դառնում, որ ծառային, աղախնուն, հարձին զանահարող, խոշտանգող և նույնիսկ մահապատժի ենթարկող տերերը կամ անպարտ են հռչակվում կամ լավագույն դեպքում ապաշխարում են միայն։ Աթանաս Աղեքսանդրացին, Բարսեղ Կեսարացին, Շահապիվանի ժողովին հավարված հոգևոր հայրերը իրավունք են վերապահում տերերին խիստ դատաստան տեսնել «յանհնադանդութեան» մեջ բռնված ծառա-աղախինների հետ։

«Եթե ուրուք ծառայ յանհնադանդութեան գտցի եւ տէրն նորա առ բազում անգամ դայրանալոյն հարցէ եւ սպանցէ», պատիժը սահմանափակվում է միայն ապաշխարությամբ³⁶։ Խիստ դատապարտվում և նդովվում են նաև այն ծառաները, որոնք «...ապստամբին եւ զնան ի տեառնէ իւրեանց»³⁷։ Խստիվ՝ արգելվում է կին ծառա-աղախին-հարձերին ամուսնանալ «...արտարոյ կամաց տեառնէ իւրեանց...»³⁸։ ...Եթե որեւէ մեկը խախտում է այս կանոնը, ապա նրա ամուսնությունը դիտվում է որպես անպատկանություն³⁹։ «Եղին ոմանք,— ասված է Ներսեսի և Ներշապուհի կանոններում,— և վաշխս վասն դահեկանաց իւրեանց», ոմանք էլ իրենց կանանց վաճառքի են հանում «...որպես ծառայս եւ այլքն ետուն վարձանս կանանց իւրեանց»⁴⁰։ Կանոնագրքում կան շատ հոգվածներ, որոնք հայ ֆեոդալական հասարակության ստորադաս խավերին ու դասերին միշտ էլ հակադրում են «աղատներին» և մատնացույց անում առաջիկաների «անազատ» և վերջինների «ազատ» կացությունը⁴¹։

8. Սոցիալական շարժումները և դասակարգային հակամարտությունները.

«Կանոնագիրք Հայոց»-ում պահպանված վկայությունների ուսումնասիրությունը մեզ հիմքեր է տալիս վաղ ֆեոդալիզմի դարաշրջանում Հայաստանում ծավալված սոցիալական շարժումներն ու դասակարգային հակամարտությունները բաժանել երկու հիմնական էտապների. ա) պասսիվ պայքար. որն արտահայտվել է նրանով, որ շահագործվող դասերն ու հասարակական խավերը կամ անձամբ կամ առանձին ընտանիքներով և նույնիսկ առանձին խմբերով հակադրվել են աշխարհիկ ու հոգևոր ֆեոդալական շահագործմանը. անհատորեն կամ խմբովին հրաժարվել են վճարել հարկեր և տուրքեր, կատարել ֆեոդալական պարհակներ, շեն ենթարկվել դատական որոշումներին

35 Նույն տեղում, էջ 95—96։

36 Նույն տեղում, էջ 303։

37 Նույն տեղում, էջ 319։

38 Նույն տեղում։

39 Նույն տեղում, էջ 347—349։

40 Նույն տեղում, էջ 479։

41 Նույն տեղում, էջ 41, 404, 414, 415, 427, 466 և հտ.։

պայքարել են անհատ ֆեոդալների դեմ, ոչնչացրել են նրանց, հրդեհել ցանք-
ուերը, կոտորել անասունները, սանձահարել են նրանց ոտնձգությունները իրենց
անձի, րնտանիքի նկատմամբ կամ թե լքել են իրենց տերերին, փախել ֆեոդա-
լական դաժան լծից ու շահագործումից դեպի անառիկ լեռները, անմարդա-
քնակ վայրերը և այնտեղ հիմնադրել նոր համայնքներ:

բ) Հայտնի է, որ դասակարգային պայքարի բարձրագույն ձևը դինված
ապստամբությունն է: Զինված ապստամբության ժամանակ արդեն հանդես է
դալիս շահագործվող դասակարգը և սկսում է պայքարը ոչ միայն շահագործող
դասակարգի, այլև նրան հովանավորող պետության դեմ՝ ճորտական շահա-
գործումից, ստրկությունից, աշխատավճարումներից, հարկերից ու տուրքերից
աղատադրվելու, իր կյանքի ու աշխատանքի պայմանները բարելավելու և հնա-
րավորություն ստեղծելու քիչ թե շատ մարդավարի ապրելու համար: Վաղ ֆեո-
դալիզմի դարաշրջանում Հայաստանում լայն ծավալ է ստանում պայքարի
առաջին ձևը: Աշխատավոր ժողովրդի միջավայրում առաջացած տրտունջները,
հուզումները, խռովությունները արմատախիլ անելու, մասսայական փախուստն
ուրգելակելու համար հրավիրվում են հողեւոր ժողովներ, մշակվում են խիստ ու
դաժան կանոններ այն «խռովարար», «խռովասեր», «անհնազանդ», «ապրս-
տամբ» մարդկանց դեմ, որոնք անարգում, արհամարհում են հոգևոր դասին,
մերժում են պաշտոնական եկեղեցու ծիսակատարությունները, հրաժարվում են
վճարել հարկեր ու տուրքեր, կատարել ֆեոդալական պարհակներ, որոնք լքում
և փախչում են «ի տերանց իւրեանց»: «Ազգային» կամ «հողեւոր» ժողովների,
եկեղեցու առաքյալների կողմից մշակված, հաստատված և քաղաքացիական
ւրենքի ուժ ստացած կանոնները դատապարտում են դասակարգային ամեն մի
ոնդվում, պախարակում պաշտոնական եկեղեցուն խորթ ամեն մի գաղափա-
րախոսություն: Առաքելական կանոնները կրոնա-բարոյախոսական քարոզնե-
րով ջանում են մարդկանց մեջ արմատացնել այն գաղափարը, թե ովքեր անար-
դում, անգոսնում են հոգևորականին, պետք է լավ հասկանան, որ «զԱստուած
անարգեն»⁴²:

Կանոնական շատ որոշումներ անպարտ են հայտարարում կամ թե սահմա-
նում են միայն ապաշխարանք այն տերերի համար, որոնք խոշտանգում են
կամ նույնիսկ մահապատժի են ենթարկում ապստամբ և տերերին լքող ծառա-
ներին⁴³:

Վաղ ֆեոդալիզմի դարաշրջանում մասսայական «եղծումն եւ քայքայումն»
այնպիսի լայն ծավալ էին ստացել, որ IV դարի վերջին Պոլֆոգոնիայի հո-
ղեւոր հայրերը հրավիրում են Գանգրայի, իսկ հայ եկեղեցու առաջնորդները՝
Աշտիշատի եկեղեցական ժողովները՝ հերետիկոսների, հերձվածողականների
դեմ կազմակերպված պայքար ծավալելու համար: Գանգրայի ժողովում հա-
վաքված հայրերը ոչ միայն մշակում են խիստ ու դաժան կանոններ ուղղված
սոցիալական շարժումների դեմ, այլև հատուկ նամակով դիմում են հայ եկե-
ղեցու առաջնորդներին և կոչ անում անհաշտ ու դաժան պայքար սկսել Հայաս-
տանում և Փոքր Հայքում լայն ծավալ ստացած «հերետիկոսների» դեմ: Ժողովի
ի կանոնը դատապարտում է այն բոլոր անհնազանդ ծառաներին, որոնք արհա-
մարհում և հեռանում էին ծառայությունից:

⁴² Կանոնագիրք Հայոց, էջ 43:

⁴³ Նույն տեղում, էջ 303, 319—320:

«Ոյք գծառայ... արհամարհեալ դուեարս իւրեանց եւ հեռանալ ի ծառայութենէ նոցա և ոչ ամենայն փութությամբ պատուել և պաշտել զնոսա... նդովեալ լիցին»⁴⁴:

Գանգրայի ժողովում հաստատված մի շարք կանոնները մեզ հնարավորություն են տալիս ասելու, որ ժողովի նախօրեին հանդես էին եկել շատ «հերձուածութիւնք, որք... անմտութեամբ իւրեանց... Եւ այլ իմն այլաշոն կարգս ի մէջ բերեալ թիւրէին գուղիղ կարգս եկեղեցւոյ»⁴⁵:

Հերետիկոսները ժխտում էին պաշտոնական եկեղեցու անհրաժեշտությունը, նրա ծիսակատարությունները և քարոզում էին, թե հավատացյալները իրենց աղոթքը կարող են առանց եկեղեցու և հոգևորականության միջնորդության լսելի դարձնել արարչին:

«Ոյք արտաքս քան զեկեղեցին ժողովս ժողովեցին եւ արհամարհեցեն զեկեղեցին... նդովեալ լիցին»⁴⁶:

Սկսած IV դարից սոցիալական շարժումները և դասակարգային հակամարտությունները լայն ծավալ են ստանում նաև Հայաստանում: Մի կողմից սեփական շահագործող դասակարգի շահատակությունները, մյուս կողմից օտար բռնադատիչների արշավանքներն ու ասպատակությունները ծայր աստիճանի սրել էին դասակարգային պայքարը շահագործող և շահագործվող դասակարգերի միջև: Դասակարգային պայքարը եթե ոչ վերացնելու, զոնե ջլատելու, թուլացնելու համար Ներսես կաթողիկոսի գլխավորությամբ IV դարի երկրորդ կեսին հրավիրվում է Աշտիշատի հայտնի ժողովը: Ժողովը պահանջում է թագավորից, մեծամեծներից և բոլոր նրանցից, ովքեր «...ի վերայ ընկերին ունիցին իշխանութիւն», զույժ ունենալ նրանց նկատմամբ, չնեղել «աւելի տարապայմանս հարկօք... քան զչափն յուշ առնելով, զի եւ նոցա տէր զոյ յերկինս»: Աշտիշատում հավաքված հոգևոր և աշխարհիկ ֆեոդալները միաժամանակ պատվիրում են ծառաներին «կալ յարդարն հնազանդութեան իւրեանց տէրանց»⁴⁷:

Ոչ միայն «աղգային» ժողովներում հոգևոր հայրերի կողմից մշակված կանոններում, այլև մեր մատենագիրների մոտ պահպանված են մի շարք վկայություններ այն մասին, որ վաղ ֆեոդալիզմի դարաշրջանում Հայաստանում սկսվել էին «անապատականներին», «բորբորիտներին» և հատկապես «մծղնէ» շարժումները: Մ. Խորենացին, ուրվագծելով հայ ֆեոդալական հասարակության տարբեր դասերի ու խավերի սոցիալական դիմանկարները, անարգանքի սյունին գամելով արժաթասեր քան աստվածասեր, կեղծավոր, վաճառաշահ, կաշառակեր կրոնավորներին, «սրժաթով ընտրեալք» եպիսկոպոսներին, վարդապետներին, կողուպտիչ, անհարիր, սնապարծ, հեշտասեր, գոռոզ ու հպարտ դորավարներին, զոզ, ժլատ, ազահ, հափշտակող «գողակից գողաց» աշխարհավեր իշխաններին», տմարդի, խարդախ, ստախոս, կաշառակեր դատավորներին, խիստ ու դաժան, ժողովրդի վրա «բեռինս... անհունս եւ դժվարակիրս» ղնող թագավորներին, օրենսդիրներին», ասում է, որ սրանց շահատակությունների հետևանքով է, որ մեծ ու փարթամ աշխարհն Հայոց դարձել է օտաթ բռնադատիչների զոհը:

⁴⁴ Նույն տեղում, էջ 193:

⁴⁵ Նույն տեղում, էջ 190—191:

⁴⁶ Նույն տեղում, էջ 194:

⁴⁷ Կանոնագիրք Հայոց, Քիֆլիս, 1913, էջ 15:

Ոչ միայն խորենացին, այլև V դարի մեր բոլոր մատենագիրները, փիլիսոփաները, հոգևոր և աշխարհիկ գործիչները սուր քննադատության են ենթարկում հերետիկոսներին: Նրանք, հատկապես Եղնիկ Կողբացին, Դավիթ Անհաղթը, Կորյունը, ջանում էին մերժել հերետիկոսների քարոզած զաղափարախոսությունը, հիմնավորել բրիստոնեական վարդապետությունը, արդարացնել այն բիրտ ու դաժան միջոցառումները, որ աշխարհիկ ու հոգևոր ֆեոդալները գործադրում էին հերետիկոսների նկատմամբ: Երբ Սահակ Պարթևը և Մեսրոպ Մաշտոցը համոզվեցին, վկայում է Կորյունը, որ «բոլոր բրիստոնեների» աղանդը լայն տարածում է գտել Հայաստանում և ունի շատ հետևորդներ, ձեռնարկեցին համոզել, խրատել և դարձի բերել աղանդավորներին, սակայն, երբ այդ միջոցներն անզոր հանդիսացան, այն ժամանակ, շարունակում է մատենագիրը, «...սաստկագոյն խոշտանդանօք պատուհասէին ի բանդ եւ ի կապանս, եւ յայլ ինչ տանջանարանս, իսկ յորժամ այնու եւ պակասեալք ի փրկութենէ գտանէին Աստուծոյ ատելիքն, ապա խանձեալս եւ մրեալս եւ պէս պէս խայտառականօք հալածէին յաշխարհէ»⁴⁸: Պատմական սկզբնաղբյուրների, հատկապես կանոնական որոշումների ուսումնասիրությունը ցույց է տալիս, որ Հին Հայաստանում լայն տարածում էր գտել նեստորի ուսմունքը: Մի այլ աղանդապետի՝ Հովհան Դամասկոսցու կուսակիցները գործունեություն լայն ասպարեզ էին գտել նաև Հայաստանում: Բյուզանդական կայսրության հոգևոր պաշտոնյաները, կաթողիկե եկեղեցու առաջնորդները ոչ միայն մեծ զգուշությամբ հետևում էին Փոքր Ասիայի հերետիկոսների գործունեությանը, այլև հատուկ նամակ-հրահանգներով պահանջում էին հայ եկեղեցու առաջնորդներից դաժան պայքար սկսել հերետիկոսների դեմ: Նիկիայի, Գանգրայի ժողովների և այլ կանոնական շատ որոշումներ մեղ հնարավորություններ են ընձեռում ցույց տալ, թե ինչ էին քարոզում պաշտոնական եկեղեցու զաղափարական հակառակորդները: Հերձվածողականները, արձանագրված է այդ որոշումներում, ոչ միայն մեծամեծ «ոճիրս» են գործում, այլև «զառնացուցանեն ղԱստուած... նոքա եւ յՈրդւոյն ուրանան, նոքա և ղՀոգին սուրբ հայհոյեն, նոքա եւ զարդար զարին հեղուն ի ղոհել շարեացն. զայնպիսիսն առաջին կանոնն եւ զիրն շարեցուցանէ եւ արժանի են մահու...»⁴⁹:

Հերետիկոսները, ասված է մի շարք կանոններում, ոչ միայն քարոզում էին իրենց տխմար մտքերը, այլև գործում էին «զաղգի ազգի այլանդակ գործս»՝ այնքան որ ծառաները հեռանում էին «ի տերանց», իսկ աղախինները՝ «ի տիկնանց իւրեանց»⁵⁰: «Ազգային» կամ եկեղեցական ժողովները ոչ միայն դատապարտում, այլև պահանջում են արմատախիլ անել կամ «ի բաց կտրեալ զվնասակար զգաղձն եւ քաղեալ զորոմնն ի ցորենոյն», որպեսզի չաճի, չտարածվի «սէղն մեղացն»⁵¹:

Սակայն սոցիալական և ոչ մի շարժում այնպիսի մեծ անհանգստություն չի պատճառել հայ եկեղեցու հայրերին, ինչպես այդ կատարել է մծղնեական շարժումը: Այդ շարժման դեմ կաղմակերպված պայքար ծավալելու համար

⁴⁸ Կ ր յ ու ն, Պատմութիւն Վարուց եւ մահուան Մեսրոպայ Վարդապետի մերոյ թարգմանչիւ-Թիֆլիս, 1913, էջ 50—51: Հմմտ. Մ. Խ ո ռ ե ն ա ց ի, էջ 336:

⁴⁹ Կանոնագիրք Հայոց, էջ 172:

⁵⁰ Նույն տեղում, էջ 191:

⁵¹ Նույն տեղում:

Հովասափ կաթողիկոսի ղեկավարությամբ 447 թ. հրավիրվում է Շահապիվանի հայտնի ժողովը⁵²:

Շահապիվանի ժողովում մշակված, հաստատված և քաղաքացիական օրենքի ուժ ստացած կանոնները բաժանվում են երկու խմբի. առաջին մասում բավական ընդարձակ և պատճառաբանված տրված են սոցիալական շարժումների հանդեպ գալու զրդապատճառները. խիստ կերպով դատապարտվում են եկեղեցու ներսում և հոգևոր հայրերի միջավայրում արմատացած շահատակությունները, արծաթասիրությունը, վաշխառուական գործարքները. խարաղանվում են աշխարհիկ և հոգևոր ֆեոդալների ցոփ վարքն ու բարքը, «տրտնջազող», «անբարտաւան», «կաշառառու» քաղաքացիները, դատավորները և այլն:

Կանոնական որոշումների երկրորդ մասը, որն ավելի բիրտ ու դաժան է, ուղղված է բացառապես մծղնեական աղանդի դեմ. ժողովը պահանջում է ամենադաժան դատաստան տեսնել ոչ միայն աղանդավորների, այլև նրանց հովանավորողների, հարողների կամ նույնիսկ համակրողների հետ:

Շահապիվանի ժողովի Ա և Բ, ԺԴ կանոնները արգելում են ամուսնանալ կամ որևէ այլ կապ ունենալ մծղնեականների հետ: Հոգևորականները, կամ ով «եւ իցէ ոք ի պաշտօնէից կամ յուխտէ», եթե հարում են պիղծերին, կամ ամուսնանում են աղանդավորների հետ, ոչ միայն անհապաղ կարգալույծ են արվում, այլև ենթարկվում են դրամական տուգանքների⁵³: Ավելի դաժան պատժիչ միջոցներ են սահմանված ԺԽ և Ի կանոններում:

Այս կանոններում իրավունք է վերապահված մծղնեական աղանդին հարած ծնողներից վերցնել նրանց երեխաներին և հանձնել ռի ձեռս սուրբ պաշտանէից Աստուծոյ, որ սնուցեն եւ ուսուցեն զնոսա ի հաւատս ճշմարիտս եւ յերկիւղ ճեառնս⁵⁴: Ժողովը պահանջում է դատական խիստ պատասխանատվության ենթարկել ոչ միայն հայ նախարարներին, այլև նրանց ընտանիքի անդամներին:

«Եթէ, սահմանված է Ի կանոնում, ի նախարարի տան գտցին պղծաթիւնքրն, կամ կին նորա կամ դուստր կամ որդի կամ ինքն իսկ զլխովին... ամենայն տամբ իւրով եւ ծննդովք եւ կենաւք նղովեալ լիցի. ի հրապարակ մի իշխեսցէ գալ, ընկերք եւ աշխարհ ամենայն մի՛ հաղորդեսցին ընդ նմա, մինչեւ թէ ինքն իցէ ի պղծութեանն՝ ի սրբութիւն եկեսցէ»⁵⁵: Ժողովի որոշումների ուսումնասիրությունը ցույց է տալիս, որ այնտեղ էլ պաշտպանվում է դասային խտրականությունը. եթե մծղնեական աղանդին հարող ստորադաս մարդկանց, շինականների և նույնիսկ գյուղական երեցների համար սահմանվում է ծեծ, աղվեսդրոշմ, հարկադիր աշխատանք, ապա աղատների ու նախարարների համար միայն նղովք և ապաշխարանք:

Որ դասակարգային հակամարտություններն ու սոցիալական շարժումները բավականին լայն ծավալ էին ստացել «Կանոնագիրք Հայոց»-ի կազմման ժամանակաշրջանում, այդ են ապացուցում նաև Աղվանից աշխարհի արքա Վաշագանի, Դվինի ժողովի և Հովհաննես Օձնեցու կանոնական որոշումները,

52 Նույն տեղում, էջ 425—426:

53 Նույն տեղում, էջ 429—432:

54 Նույն տեղում, էջ 461—462:

55 Նույն տեղում, էջ 464—465:

որոնցից առաջին երկուսը չեն մտել «Կանոնագիրք Հայոց»-ի մեջ: Այստեղ բննարկվող հարցի առնչությամբ նրանք մեծարժեք սկզբնաղբյուրներ են: Աղվանից արքա Վաչագանի կանոնների ներածության մեջ արձանագրված է, որ այդ պատմաշրջանում «...բաղում հակառակութիւնք լինէին ի մէջ աշխարհականաց, եպիսկոպոսաց, քահանայից ...աղատաց եւ ուսմկաց»⁵⁶: «Բազում հակառակութիւնքն» եթե ոչ վերացնելու, գոնե մեղմելու համար մշակվում են մի շարք կանոններ: Նախ սահմանվում են հարկերի և տուրքերի որոշակի չափեր, այնուհետև մշակվում են մի շարք կանոններ շահատակությունների, կամայաձանությունների, կաշառակերության, անարդար դատավարության և հասարակական այլ շարիքների դեմ: Այս իմաստով ավելի ուշագրավ են ներսես Տայեցի կաթողիկոսի ղեկավարությամբ հրավիրված Դվինի ժողովի որոշումները: Ժողովը քննարկում է հայ ֆեոդալական կյանքի բազմաթիվ հարցեր, առաջարկում է ղեկատուներ եկեղեցու բարոյալքված հեղինակությունը վերականգնելու, վերացնելու նրա ներսում հանգես եկած «թուլութիւնքն» և «անկարգութիւնքն», արմատախիլ անելու խռովությունները և այլն: Ժողովը միաժամանակ որոշում է, որ յուրաքանչյուր ոտնձգություն եկեղեցու, հոգևոր հայրերի դեմ՝ ոտնձգություն է արարչի դեմ: Ժողովը խստիվ խարազանում է եկեղեցու «սեփական ժառանգութեան» դեմ հանգես եկած ազատներին, նախարարներին և հատկապես շինականներին: Սրանց պետք է հայտնի լինի, որ «ի սկզբանէ որպիսի հրաման ի սրբոյն Գրիգորէ է լեալ՝ նոյնպէս եւ եղիցի... զժառանգութիւն սրբոյ եկեղեցւոյ իբրեւ զազատութիւն է, զոր երանելոյ սրբոյն Գրիգորի եւ թագաւորին մերոյ Տրդատայ զատուցեալ են»⁵⁷: Բնական ու հասկանալի է, որ այդ «ազատութեան» դեմ հանգես եկած ամեն մի շարժում պետք է դիտվեր և զնահատվեր որպես սատանայի արարք, շարի գործ: Դվինի ժողովը նույնպես հետապնդում է երկու հիմնական նպատակ: Նախ, նա բացորոշ կերպով դատապարտում է «ձիարուծք», «վաւաշոտք», «վաճառականք», «հարկահանք» հոգևորականներին, դաժան, ազահ «գողակից զողաց», «աշխարհականք իշխանաց» այն բանի համար, որ նրանք պայքարում են մեկը մյուսի դեմ, ջանում են ընդարձակել իրենց կալված տիրույթները, ձեռք բերել հպատակ ու հարկատու բնակչություն: Այնուհետև ժողովը հատուկ կոչով դիմում է աշխարհիկ և հոգևոր ֆեոդալներին միասնական ճակատ կազմել ժողովրդական սաստկացող արտունջների ու ցասումների դեմ: Դասակարգային դաժան գոտեմարտերի սարսափն այնքան ահեղ էր, որ հայ ուղղափառ հավատքի քարոզիչները ստիպված առաջարկում են դաշինք կնքել հայ լուսավորչական ու քաղկեդոնական դավանանքների մեջ՝ հայ և բյուզանդական եկեղեցիների և՛ ներքին և՛ արտաքին թշնամիների դեմ պայքարելու համար: Դվինի ժողովում մշակված և հաստատված կանոններում մենք նկատում ենք վաղ ֆեոդալիզմի դարաշրջանը Հայաստանի սոցիալական շարժումների արձագանքները և նրանց դեմ կազմակերպված պայքարի մարտական ոգին: Եվ վերջապես, հերետիկոսական, բոստկության, սոցիալական շարժումների դեմ մի շարք կանոններ է մշակել ինքը, կանոնագիրք կազմողը՝ Հովհաննես Օձնեցին:

Հայոց հայրապետը վկայում է, որ իր օրերում էլ շատ անհավատներ և «սատանայի շար որդիներ» կրկին «...չոգան, զօղեցին յոլորտս ուրեք աշխար-

⁵⁶ Կանոնագիրք Հայոց. Թիֆլիս, 1913, էջ 192:

⁵⁷ Նույն տեղում, էջ 123:

հիս մերոյ»: Նրանք, շարունակում է Օձնեցին, «սարսեալք կային յուղիղ կրօնից բրիստոսականաց» և դուրս գալով իրենց «յորջից... ի միասին բնթացեալ կուտեղան ամենայն ուստեք, որպէս անգեղք աշխարհաց... Եւ զանունն իւրեանց դախտախինդս յանդգնեցան կոխել զայնցանէ, որ զերկնից բարութեանցն բուռն հարեալ ունիցին յուսով»⁵⁸:

Օձնեցին իր կանոնադրքի ԻԹ, լԵ կանոններում պահանջում է, թե «Ոչ է պարտ ամենեւին անխտիր լինել եւ հաղորդութիւնս առնել ընդ հերձուածողաց», այլ և «խորշել ի նոցանէ»: Օրենսդիրը ասում է, որ «Ոչ է պարտ ի շարադանդ մծղնէիցն տեղիս, որ կոշին պոլիկեանք, ալիել ումեք եւ կամ յարել եւ խաւսակից լինել եւ երթեւեկութիւն առնել, այլ ամենեւին հեռանալ ի նոցանէ, զարշել եւ ատել զնոսա», որովհետեւ նրանք «որդիք սատանայի են եւ լուցկիք յաւիտենական հրոյն եւ աւտարացեալ են ի սիրոյ կամաց Արարչին: Բայց եթե որեւէ մեկը «յարեսցի նոսա, եւ սիրելութիւն եւ բարեկամութիւն եկեսցէ, պարտ է զայնպիսիսն խոշտանգել եւ ծանր պատուհաս ի վերայ դնել... Ապա եթէ դարձեալ ի նմին գտցին վերստին, զայնպիսիսն հրամայեմք ամենեւին հատանել եւ արտաքս ընկենու իրրեւ զժանդախտս յանդամոց եկեղեցւոյ Քրիստոսի»⁵⁹:

Այսպիսով, «Կանոնագիրք Հայոց»-ը իր մեջ ամփոփում է բազմաթիւ կանոնական որոշումներ, որոնք մեզ հիմքեր են տալիս պարզաբանելու վաղ ֆեոդալական Հայաստանի սոցիալ-տնտեսական կյանքի բազմաթիւ հարցեր: Սակայն նրա նշանակությունն այսքանով չի սահմանափակւում: Կանոնագրքի մեջ տեղ են գտել նաև շատ որոշումներ, որոնք շոշափում են իրավունքի, փիլիսոփայության և գիտության այլ բնագաւառներին վերաբերող շատ ու շատ հարցեր:

ОТРАЖЕНИЕ СОЦИАЛЬНЫХ ОТНОШЕНИИ В «АРМЯНСКОЙ КНИГЕ КАНОНОВ»

Проф. С. Е. АКОПЯН.

(Р е з ю м е)

«Армянская книга канонов» историка, крупного законодателя, государственного и политического деятеля, католикоса VIII в. Иоанна Одзиеци является одним из редких и замечательных юридических и культурных памятников эпохи раннего феодализма и богатейшим историческим источником, проливающим свет на все стороны жизни того времени. Она представляет большой научный интерес не только для изучения истории правовой науки, но и для понимания всей социально-экономической и политической жизни древней Армении. Более того, она является неоценимым первоисточником для изучения жизни и быта армянского народа—его занятий, семейных социально-экономических и правовых отношений в период раннего феодализма. В «Книге канонов» ярко отразились также социальные движения и классовая борьба в Армении.

⁵⁸ Յովհաննու Իմաստասերի Աւանդուոյ Մատենագրութիւնք, Վենետիկ, 1883, էջ 39:

⁵⁹ Կանոնագիրք Հայոց, էջ 533—535: